

Messadi pertuccont il credit d'impegn per la sanaziun dalla Via da Scola, Glion

Preziau signur president dil parlament
Stimadas parlamentarias, stimai parlamentararis


Situaziun da partenza e finamira

La davosa renovaziun pli gronda dalla Via da Scola ei stada avon quater decennis. Entuorn igl onn 1990 ein ils obstachels per calmar il traffic vegnir installai. La Via da Scola a Glion ei vegnida veglia e sesanfla en in schliet stan. Muort il fundament insufficient ed in'aula frequenza da traffic ei la substanza vegnida donnegiada. Las lingias d'allontanar las auas da via ston vegnir renovadas e separadas dalla reit dall'aua piarsa.

La Via da Scola sesanfla en ina zona da tempo 30, ei denton concepida aschia ch'ella carmala da carrar pli spert. Cunquei che la scoletta, la scola publica e la scola professionala sesanflan direct sin quella via, eis ei da metter gronda peisa sin la segirtad. Cun la nova concepziun duei la via daventar pli segira, cunzun per il traffic plaun. Il vial vegn restrenschiu ella ladezia grazia a mesiras da baghegiar corrispundentas. Ultra da quei contribueschan plantas e ruogs da flurs ad in spazi stradal pli attractiv. Ils obstachels actuals vegnan allontanai, cunquei ch'els corrispundan buca pli al standard ed impedeschan la rumida da neiv. Ils passapeis vegnan extendi sin ina ladezia da 2.0 m sin omisduas varts. Dalla vart dalla casa da scola vegn il passapei prolungius per 40 m en direcziun nord. Per risguardar las prescripziuns dalla lescha davart l'egualitad da personas cun impediments vegn installau da niev in access senza pass (rampa) dalla Via da Scola egl areal dalla casa da scola.



Las lingias tecnicas vegnan renovadas el tschancun sanau. La lingia d'aua, ch'ei rutta pliras gadas ils davos onns, vegn renovada cumplettamein. La lingia d'allontanar las auas da via vegn tschaffada separadamein e deviada ella lingia d'aua schubra previda per quei intent. L'illuminaziun publica existenta vegn medemamein renovada.



Cuosts d'investiziun

Gener da lavur	Via	Aua tschuffa	Aua da beiber	Total
Project e direcziun da construcziun	80'000.00	17'500.00	10'500.00	108'000.00
Impressari	580'000.00	200'000.00	25'000.00	805'000.00
Sanitar	0.00	0.00	134'500.00	134'500.00
Catram	488'000.00	40'000.00	0.00	528'000.00
Rampa casa da scola, molocs, illuminaziun, parcadis, signalizaziun, seivs, etc.	260'000.00	0.00	0.00	260'000.00
Different	0.00	34'500.00	0.00	34'500.00
Total (incl. TPV)	1'408'000.00	292'000.00	170'000.00	1'870'000.00

Il credit d'impegn necessari per la sanaziun dalla Via da Scola a Glion munta a CHF 1'870'000 incl. taglia sin plivaleta. Cun quei ch'ei setracta d'ina sanaziun totala vegn ina procedura da perimeter menada atras.

Lingias tecnicas da tiarzs

Avon entgins onns ei vegniu installau en quei tschancun las lingias per calira a distanza dall'EWZ. Cheu-tier dat ei il mument negins basegns per ulteriuras lingias, tenor indicaziuns dil gestiunari. Las lingias d'electricitad dalla fatschenta Repower vegnan renovadas en connex cun la sanaziun. Ils cuosts vegnan repartgi sin ils caschunaders tenor cumpart.

Finanziaziun

- Finanziaziun speciala providiment d'aua	CHF	158'000
- Contribuziun GVG providiment d'aua (ca. 7 %)	CHF	12'000
- Finanziaziun speciala providiment d'aua piarsa	CHF	292'000
- Finanziaziun speciala fatgs da rumien (molocs)	CHF	20'000
- Procedura da perimeter (schazegiau)	CHF	300'000
- Mieds generals	CHF	988'000

Las investiziuns nettas da CHF 988'000 vegnan amortisadas sur 40 onns.

Etappaziun

La sanaziun dalla via vegn realisada en treis etappas annualas els onns 2021–2023.

Cuosts dalla singuals etappas:

2021:	CHF	655'000.00
2022:	CHF	967'000.00
<u>2023:</u>	<u>CHF</u>	<u>248'000.00</u>
Total	CHF	1'870'000.00

Tenor art. 31 lit. d al. 1 dalla costituziun communal schai quella fatschenta ella cumpetenzza dalla cuminonza dils votants all'urna. La votaziun corrispundenta ei previda ils 16 da matg 2021.

Proposta

Sin fundament dallas explicaziuns precedentas fa la suprastanza communal las suandontas propostas al parlament communal per mauns dalla votaziun all'urna:

- per la sanaziun dalla Via da Scola, Glion vegn in credit brut da CHF 1'870'000.00 incl. in'eventuala carischia concedius.
- eventualas contribuziuns da tiarzs vegnan deducidas.
- la suprastanza communal vegn autorisada da realisar la decisiun.

Ulteriuramein fa la suprastanza communal la suandonta proposta al parlament. Quella resta resalvada dall'approbaziun dalla cuminonza da votants all'urna:

- per l'etappa 2021 vegn in credit brut da budget da CHF 655'000 deliberaus.

Ilanz/Glion, ils 9 da mars 2021

Suprastanza communal Ilanz/Glion